

LONGÆVITATE EX DIÆTA,

Q V A M,

AUSPICE DEO PROPITIO

Et Consensu atque Auctoritate Gratiſſæ Facultatis Medicæ

IN ALMA REGIA FRIDERICIANA,

P R Æ S I D E

DN. D. MICHAELE ALBERTI,

SACR. MAJ. REG. BORUSS. AULICO ET CONSIST. MAGDEB. CONSILIARIO,
MEDICINÆ ET PHILOSOPHIÆ NATURALIS PROFESSORE PUBLICO OR.
DINARIO, ACADEM. CÆSAR. NAT. CURIOS. COLLEGA, SOCIET.

REG. BORUSS. SCIENT. SODALI, ETC.

DECANO H. T. SPECTATISSIMO,

Domino Patrono, Præceptore ac Promotore suo omni honoris cultu proſequendo,

P R O L I C E N T I A

SUMMISQUE IN MEDICINA HONORIBUS ET PRIVILEGIIS
DOCTORALIBUS LEGITIME IMPETRANDIS,

HORIS LOCOQUE CONSVETIS,

ANNO MDCCXXVIII. D~~XXX~~ AUGUST.

PUBLICÆ AC PLACIDÆ ERUDITORUM VENTILATIONI

SUBJICIET

R E S P O N D E N S

JOHANNES CASPARUS ZOPF,

GERA - V A R I S C U S.

LONGEVITY BY DIET.

THE ONLY BOOK OF THE KIND
WHICH CONTAINS THE MOST
COMPLETE AND ACCURATE
INFORMATION ON THE
SUBJECT OF LONGEVITY.

BY J. L. MICHENER, M.D.

Author of "The Art of Living," "The Art of Dying," "The Art of Loving," "The Art of Thinking," "The Art of Feeling," "The Art of Acting," "The Art of Being," "The Art of Knowing," "The Art of Doing," "The Art of Having," "The Art of Losing," "The Art of Giving," "The Art of Taking," "The Art of Making," "The Art of Breaking," "The Art of Creating," "The Art of Destroying," "The Art of Living," "The Art of Dying," "The Art of Loving," "The Art of Thinking," "The Art of Feeling," "The Art of Acting," "The Art of Being," "The Art of Knowing," "The Art of Doing," "The Art of Having," "The Art of Losing," "The Art of Giving," "The Art of Taking," "The Art of Making," "The Art of Breaking," "The Art of Creating," "The Art of Destroying."

NEW YORK: PUBLISHED BY J. L. MICHENER, 10 N. 3RD ST., N.Y.

1880.

THE AUTHOR'S ADDRESS IS 10 N. 3RD ST., N.Y.

THE AUTHOR'S ADDRESS IS 10 N. 3RD ST., N.Y.

THE AUTHOR'S ADDRESS IS 10 N. 3RD ST., N.Y.

THE AUTHOR'S ADDRESS IS 10 N. 3RD ST., N.Y.

THE AUTHOR'S ADDRESS IS 10 N. 3RD ST., N.Y.

THE AUTHOR'S ADDRESS IS 10 N. 3RD ST., N.Y.



PRÆLOQUIUM.

Magna vitæ naturalis æstima-
tio inter mortales est, dum aliis o-
mnibus temporariis bonis & donis
præfertur; hinc in S. Codice in *Lib.*
Jobi c. 2. v. 4. innotuit Satanæ re-
sponsum: *pellem pro pelle & quicquid*
est viro, daturus esset pro se ipso, aut pro anima sua: si-
ve ut Lutherus commentatur: für seine Haut lässt
ein Mensch gerne fahren, Kinder, Viehe, Gesind und
aller andere Haut: neque quidem hic amor vitæ,
modo justus & voluntati divinæ congruus sit, aut il-
licitus, aut prohibitus, aut iniquus est, siquidem non
modo in genere vita hominis ejusque duratio a DEO
provenit, in cujus manu positi sunt dies vitæ nostræ
& numerati exacte; sed & longa vita divinis promis-
sionibus annumeranda est Exod. XX, 12. ut prolongen-
tur dies tui super terra, quam Jehova Deus tuus dat tibi:
Prov. III. 16. Longitudo dierum in dextra ejus, in sinistra
ejus divitiæ & gloria c. IX. n. per me multiplicabuntur dies

tui & addent tibi annos vitæ c. III. v. 2. Longitudinem dictum & annos vitæ & pacem addent tibi. conf. c. IV. 10. Deut. XXX. 20. & in opposito Psalm. LV. 24. nihilominus in S. S. sæpius brevitās & fugacitas vitæ satis perspicue & emphatice significatur Psalm. LXXXIX. v. 48. memento, ego cur brevissimi temporis: Sap. II. 1. exigua est & afflicta vita nostra, & non est remedium contra mortem hominis c. IX. 5. ego sum homo infirmus & brevis ætatis conf. c. XIV. v. 14. Esaia XL. 6. 7. Et hanc vitæ humanæ infirmitatem & inconstantiam omni ferme tempore homines agnoverunt, ex parte etiam deplorarunt, hinc Seneca in Consol. ad Marcian. XX. dixit: nihil est tam fallax vita humana: hinc hortatur de Brevit. vit. c. 7. Vivere tota vita discendum est; & quod magis fortasse miraberis, tota vita discendum est mori, & in Lib. 3. de benef. c. 31. non est bonum vivere, sed bene vivere: proinde exclamat in Ep. 77. Nonne tibi videbitur stultissimus omnium, qui fleverit, quod ante annos mille non vixerat; æque stultus est, qui flet, quod post annos mille non vivet; hæc paria sunt non eris, nec fuisti. & iterum in Lib. 2. natural. quest. c. ult. Magno æstimamus mori tardius: cum ejusmodi effato itaque testimonium & suffragium suum conciliat dictum Horatii Lib. 2. Satyr. 6. v. 97. Vive memor, quam sis ævi brevis: Et qui vitæ humanæ ærumnas & calamitates probe perpendit, facile agnosceret veritatem effati Ciceronis Tusculan. I. c. 31. quod hæc vita mors sit & Euripidis ap. Plat. ad Apoll. p. 120. quod hæc vita nomine talis sit, re ipsa labor: & quot non miseriæ hanc circumdant naturalem vitam; quilibet dies nobis infirmitatis humanæ nova prodit specimina:

na: quotidie morimur etiam naturaliter, sicut Apostolus *1 Cor. XV. 31.* elocutus: *diebus singulis morior: moritur indies existentia nostra, quod heri fuimus, nec hodie sumus, nec erimus porro: fugit tempus, fugit vita nostra; aut quod ad vitam nostram referri potest, ita etiam Langius Lib. 1. Ep. 79. eloquitur: singula hora, imo temporis momenta aliquid de nobis deprædantur. Hinc Seneca Ep. 58. dixit: nemo nostrum idem est in Senectute, quod fuit Juvenis, nemo est mane, qui fuit pridie; indies enim quicquam de corpore nostro consumitur, destruitur adeoque moritur, hinc indies quicquam compensatur & reparatur: inde ingesta quotidie sunt necessaria, quia indies egestionem procedunt: & licet partes solidæ non semper per temporum intervalla consumantur, quod tamen ex parte in Senectute contingere videtur, tamen fluidæ ob suam laxitatem, mollitiem & lubricam mixtionem, præcipue vero ob suum perpetuum comeatum & circuitum per partes solidas in brevi temporis mora successive tamen resolvuntur; quare semper nova ingeruntur, nova præparantur, nova adduntur: quid quod evenit, ut ex ubertate pinguis gelatinosæ alimentosæ substantiæ, pinguedo & ossium medulla deposita & asservata, alia occasione ob aliam necessitatem resorbeatur, auferatur & consumatur: Quam brevis tamen vita apparet, admiratione tamen dignum est, cur nihilominus tam diu perduret, quoniam sub tanta corporis infirmitate atque fragilitate & causarum lædentium multiplici concursu citius vita hominis exspirare posset, imo, si tantum causæ nude physicæ & materiales in formali vitæ ratione præva-*

A 3 lerent,

lerent, etiam deberet: sicut itaque multiplices causæ sunt, quæ vitæ brevitatem inferunt, ita inter varias alias merito *Diætæ vitia* numeranda, quæ etiam *Hollerius in scholiis ad 1. aph. Hipp. Sect. 1.* allegat: hinc *Seneca Ep. 95.* asserit: *immunes erant a tot morbis, qui nondum se deliciis solverant, qui sibi imperabant, sibi ministrabant: Simplex erat ex simplici causa valetudo; multos morbos multa fercula fecerunt: vide quantum rerum per unam gulam transitarum permisceat luxuria, terrarum marisque vastatrix: innumerabiles esse morbos, miraris! coquos numerosa?* Sed dum *Diætæ vitia* tot morbos invitant & frequentius ad vitæ brevitatem contribuunt, inter ea homines, quibus quadantenus mens sana existit, longævitatē amant, ita non parum ad longiorem vitam contribuet bona, congrua & ordinata *Diætā*, quæ inter res non naturales multum valet; quare hoc loco peculiari instituto divina bonitate adfistente suscepimus, ut **LONGÆVITATEM EX DIÆTA** nonnullis meditationibus explicemus & commendemus. Faxit benignissimus author & conservator vitæ nostræ, ut hæc disquisitio ad vota nostra succedat.

§. I.

Longævitatē ex *Diætā* probantes & demonstrantes in primo hoc accessu, quædam pro tituli explicatione & illustratione annotare volumus: *Longa vita præcipue Dei donum est, qui vitæ nostræ author, curator, conservator & promotor est: hinc Psalmista canit Ps. XXI. 5. vitam petiit a te, dedisti ipsi longitudinem dierum, hinc a Deo etiam longævitas primario*

rio provenit Ps. XCI. 16. *longitudine vitæ saturabo eum & ostendam ei salutem meam*: Disce itaque dicit Baruch. III. 14. *ubi sit prudentia, ubi sit robur, ubi sit intelligentia, ut cognoscas simul, ubi sit longævitæ & vita, ubi sit lux oculorum & pax*: proinde tamen almus Creator variis naturalibus mediis benedixit, ut ad *sanitatem* nostram tuendam & *vitam* fulciendam quicquam conferant: *Longævitatē* itaque in hac tractatione non sensu *absoluto*, sed *relativo* accipimus: & quidem quomodo hoc aut illud subjectum quoad *individuales & personales* rationes ac *qualitates diutius* vita frui queat, quam si *indiscriminatim* & sine regula atque ordine mediis *naturalibus* ad *vitam* necessariis uteretur: hinc multi dantur homines, qui secundum Philosophi Platonici *Maximi Tyrii* effatum, in *dissert. 20. p. 203. mortem quidem metuunt, vitam tamen negligunt*, i. e. laxè vivunt, variisque periculis se subjiciunt: quam ob rem haud temere *certum terminum fixum* definimus, quo homo *longævus* centum & plures, aut nonaginta, aut octoginta, aut septuaginta annos attingere debeat; quoniam nonnulli homines pro *discreta & individuali* ratione *sexagenarius*, aut *quinquagenarius* longævus vocari potest, qui pro reliqua sua *imbecillitate citius* e vita discedere potuisset, dum vero *regalis* ad *longævitatē* acquirendam *salutaribus* obtemperat, *Divina* annuente bonitate, *diutius* vitam suam protrahit, ut alii *comparativam* talem *longiorem* vitam facile agnoscant: potest itaque homo vitam suam *abbreviare & prolongare*, in genere sub divina providentia & omniscientia, qua omnium hominum orsus & exitus in vita naturali & ex hac oculis Dei præsens & cognitus est: hinc *Langius Lib. 1. epist. 79.* dicit: *quare vitæ naturalis scopus non est adeo fatalis & invincibilis, ut per divinam potentiam non possit prolongari, aut per pravam victus rationem abbreviari, vi gladii aut cannabis decurtari, cujus scopum ob crapulam centesimus aut millesimus quisque*
vix

vix assequitur: Discrepat itaque Longævitæ per omnia temporum æva, ut non æque judicandum sit, quod ante & proxime post diluvium homines ad seram senectutem pervenerint, dum vicissim exempla prostant, quod nostris temporibus nonnulli homines æque ad Moysi & Davidis ætatem pertingant, siquidem illis priscis temporibus perinde haud singuli homines ad hanc annorum periodum pervenerunt, ut propterea inter antiquiores æque quidam homines robustiori & firmiori natura & corpore instructi fuerint, alii vero debiliori & teneriori, uti hodiernis ævis contingere solet: Hæc itaque tractatio de vita longa omnibus ferme ævis eruditis commendata fuit, sicut Aristoteles suo libro de longævitæ & brevitate vitæ innotuit: conf. Phlegontis Tralliani tr. *Ἐν μακροβίῳ* Maximiliani Sandei Symbola vitæ humanæ, Lamelinus de vita longa, Holterhof de vita longa & brevi, Villanova in arte ad vitam longam perveniendi, Meibomii Epist. de Longævis, Helmontius tr. de vita longa & brevi, Paracelsus de vita Longa, Wedelii disp. de vita longa, Zac. Lusit. M. P. H. lib. 6. hist. 17. qv. 8. p. 961. seq. Joepseri Manuductio ad vitam longam, Bartholinus Cent. 5. hist. 28. Behrens de vita longa, D. D. Præsidis Praxis extemp. Cas. 1. de Longævitæ hominis, variique alii authores diversarum facultatum.

§. II.

Et quoniam ad Longævitatem acquirendam passim varia proponuntur media & adminicula, ita hoc titulo atque loco congruam & bonam Dietam tanquam præcipuum auxilium, ad acquirendam vitam longam allegabimus & commendabimus: hinc plurimi medici qui Longævitatis reminiscuntur inter alia vitæ simplicitatem & bonam Dietam concelebrant: ita Langius l. c. dixit: Primum itaque nosti præter Sacras litteras Josephum ac Eusebium testari, Noë post diluvium trecentos & quinquaginta adhuc vixisse annos, ob
reli-

religionis pietatem, sobriam victus rationem; & Rejes.
Camp. Elys. juc. qv. 25. n. 15. 16. scribit: Hanc sobrietatem
victusque simplicitatem & temperantiam a probatissimis
viris semper laudatam legimus apud Ciceron. V. Tuscul. qv.
apud Macrobiū 6. Saturn. c. 4. nec non apud Poetas - -
non aliter Flavius Josephus Lib. 2. de bell. Jud. Essenos narrat,
quam longissime vivere & ad 100 annos non paucos perdu-
rare, quod victus simplicitatem ac rectam in cibis normam
observarent - - Paucissimis veterum contenta fuit vita
& tunc ad naturam vivebant homines, edebantque advi-
vendum, nunc ad comedendum vivitur & magnitudo omnis
non in sobrietate, sed in ferculorum multitudine consistere
creditur, qui plura consumit & plura exhaurit pocula, vi-
ribus magis fidit, mox defecturis: nec ullus est, qui videat
obsonia non esse, quæ devoramus, sed nature onera, quibus
obruitur & in tristium morborum doloribus solvenda gau-
dia; quippe dum Sacra Ecclesiæ elogia non attenduntur &
medicina præcepta nil penduntur, imo hæc omnia contem-
nuntur, pereunt salus & vita & ut paululum vivamus,
vivere desinimus, ac vix est qui alieno, imo suo malo sapiat:
Sic porro Bernh. Gordonius de Conservatione vitæ humanæ
præcipue bonam & exactam Dietam, tanquam celebre &
efficax eo contribuens & spectans medium commendat
& Wedelius in disp. de vita longa c. 3. p. 28. asserit: in cau-
sis naturalibus singulis, primario Dietæ regimen uni cui-
que ætati, temperamento, habitui & individuo proprium
ac congruum, lege artis, tum ordinandum tum prosequen-
dum: Hæferus in Hercule Med. L. 2. c. 1. p. 100. 101. eloquitur:
utebantur homines ante simpliciore victu: nunc vero va-
rius cibus nos cum dispendio sanitatis delectat: In multis

enim escis erit infirmitas Eccles. 37. v. 33. Cujus sententiæ veritas, quotidiana experientia confirmatur, qua videmus plebejos & quibus est res angusta domi, seniores effici, quam divites: cum hisce testimoniis consentiunt Martinus Pansa de propaganda vitæ, Rogerus Baconius de secretis artis & naturæ cap. 7. Salmasius in Diatribe de annis Climactericis & plurimi medicorum; inter alia testimonia ex alio foro petita, fide digna præcipue est sententia Theologi Consummatissimi B. Dn. D. Speneri, (cujus memoriam DEUS contra omnes Satanæ hujusque instrumentorum aggressiones, fatuas oblocutiones & ludicras hæreticas invasiones in æternam benedictionem ponat) quam in funebralibus Concionibus Part. IV. Conc. 3. p. 47. 48. solidissima propositione & demonstratione profert; dum itaque physici a medicis imprimis hujus veritatis fundamentum mutare debent, Theologi vero non modo naturales, sed & divinas causas scrutari & conciliare solent, Jure Consulti denique perinde physicis rationibus niti debent, ita universalis hic est consensus, quod Dieta cuilibet individuo accommodata justa & conveniens multum ad vitam longam conferat: ubi tamen frustra universales regulæ atque leges injungendæ & obtrudendæ sunt, cum qualitates hominum admodum discrepent, quibus semper speciales regulæ ordinandæ sunt, quemadmodum Dieta secundum ætatem, temperamentum, sexum, vires, vitæ genus, nationes, consuetudinem, educationem &c. discrepat: nos vero hoc loco generalem & haud specialissimam disquisitionem propositi thematis instituemus.

§. III.

Per Dietam itaque intelligimus accuratam & congruam victus & potus usurpationem, quæ accommodata esse debet peculiaribus qualitatibus diversorum subjectorum & individuorum: quam ob rem haud in sensu latiori

ri

ri illam accipimus, uti *Ettmullero in Opp. Tom. 1. p. n. 208.* ubi de sex rebus non naturalibus agit, placuit, quando dicit: *Regimen harum rerum* (videl. non naturalium) *dicitur diæta*: de hac diæta judicat etiam, quod *primario ad sanam vel ægram*, (addit tamen) *non vero ad longam vitam faciat*; *minime omnium autem vitam ad annos 120, proroget, sicuti Claudio Theodato in Pantheo hygiastico placuit*: ita *Sennertus instit. medic. Lib. 5. Part. 2. Sect. 3. c. 2. asserit*: quod *diæta præcipue cibo & potu constet*: placet itaque nobis in sensu proprio & haud amplo Diætae rationem in hoc themate habere & instituere: requiritur itaque *congruus usus cibi & potus ad vitam sanam æque ac longam*: quo etiam *justus ordo* in hoc usu spectat: etenim huc etiam quadrat, quod *Xenophon in æconomicis* elocutus est: *nihil hominibus æque utile & honestum atque decorum est, ac bonus & legitimus ordo*: quam ob rem ad *quantitatem, qualitatem & ordinem* in usu victus & potus advertendum est: *conf. Illustr. Stablii diss. de Diæta §. 1.* Haud vero sanitati & vitæ conducit perquam *scrupulosa, delicata & mollis* valde Diæta, unde potius naturæ hominum *corrumpuntur, emolliuntur & torpidiores redduntur*, siquidem illi, qui *nimis strictum & rigorosum obsequium diæteticis regulis præstant*, facilius ad morbos disponuntur, *conf. Exc. D. D. Stablii Opusc. physico-medico-chymica in observatione de sollicita Diæta X. p. 276. qui præc. p. 284. profitetur*: ante omnia ab ipsa usque *Infantia nimis sollicitam mollem ejusmodi Diætam abesse velim, qua non solum ipsi mores, perpetuis cavendi, metuendi, contemnendi, seligendi inculcationibus & absoluta illa omnium minus solitarum rerum aversione, cujuslibet minoris jucunditatis imprimis autem levissimorum forte dolorum aut incommodorum fortuitorum, formidine aut impatientia multis modis a teneris, quod ajunt, unguiculis, pervertuntur, sed etiam molle, nimis quam*

sensibile, ne mediocrium quidem fastidiorum, nedum laborum patiens redditur corpus: imo potius perpetuis quiritationibus, quin veris & nihil simulatis sanitatis interversionibus, si affectatam illam æquæ absolute observare, varia fortuita circumstantia vetent, plana via sternitur: huc etiam pertinet laudati Viri *Dissertatio de Diæta* in qua passim hanc scrupulosam & sollicitam, aut rigorosam diætā improbat: huc quadrat observatio *Riedlini in Lin. Med. An. 4. Mens. Sept. obs. 23. p. 783.* cui titulus: *Dietam stricte servans errorem contra eandem ægerrime ferens*: Ad integritatem vero vitæ animalis conservandam requiritur virium sufficiens robor tam in universo corpore, quam seorsim in organis ad functiones vitales & naturales ex parte idoneis, præfens; deinde huc pertinet iusta sanguinis temperies & conveniens consistentia: sufficiens partium fluidarum quantitas, ne excedant, neve deficient, congrua partium solidarum flexilitas, se- & excretionum iustus successus, vegetus cibi & potus appetitus & concoctionis processus liber, promptus & legitimus humorum progressus, iusta ingestorum & egestorum proportio, organorum debita permeabilitas & puritas &c. ad hosce præcipuos respectus Diætā ita dirigenda est, ut hæ qualitates hique effectus rite perennent, ita etiam per Diætā sanitati & vitæ durabiliori prospicitur.

§. IV.

Ex fonte itaque *Dietetico* ad vitam longam acquirendam positive commendatur potus *Aquæ* quotidianus, loco cerevisiarii, imo vinosi, aut alterius spirituosi: hinc *Aqua* pro universali auxilio medico & dietetico æstimatur, cujus asserti multiplicia testimonia proferri possent: suffecerit veritatem hujus sententiæ a priori & posteriori demonstrasse: e ratione itaque fluit, quod aquæ potus temperatissimus existat, qui haud corpus humanum aggravat, modo

modo cum *moderamine* adhibeatur & *adsuetudo* illius *salubrem* effectum promoveat: aqua enim *pura diluit humores*, temperat serum acre, *lenit* fibras motrices, *humectat* partes, eluit & *aperit* poros, *emollit* humores & *materias crassas*, temperat humores, ne qualiscunque *acrimonia* prævaleat, *impedit* copiosiore**m** *bilis* generationem, dum principia bilis per *diuresin* & insensibilem *transpirationem* ad *faciliorem* excretionem disponit, præmunit partes *teneras sensibiles*, ne ab *acribus* humoribus molestius afficiantur, adjuvat ciborum *resolutionem*, impuritatum *abstersionem* tam e nexu cum partibus *fluidis*, quam ex adhesionem in partibus *solidis*, præoccupat suspectas *stagnationes*, emollit & *elubricat* vias *excretorias* &c. ex *experientia* vero innumeris exemplis probatum est, quod homines qui *Aquæ potui adsueti* sunt, *illibata* sanitate & *diuturna* vita fruuntur, in quibus præcipue *necessariæ & salutares* evacuationes *prompte* & placide succedunt, insuperque humores in *iusto* progressu conservantur & si sub reliqua *Diæta idonea roborantia* & temperata *aromatica* usurpantur, *vanus* est metus, quod aqua partes *enervet*: proinde innumera constant *testimonia* hominum, qui sub *iusto* aquæ usu & potu *longiorem* vitam & *constantiore* sanitate attigerunt & acquisiverunt: quid quod ex observatione medica abunde constat, quomodo homines, posteaquam *circumspectum* Aquæ usum selegerunt & adhibuerunt, non modo a *præcedentibus* quibusdam periculosis *morbidis* invasionibus liberati fuerint, sed & ad magis *vegetam* & firmam sanitate**m** pervenerint: facile enim *ratione* quisquam assequi potest, quod *multiplex* cerevisiæ *mutatio*, quæ ex *qualibet* ferme illius coctione & præparatione provenit, imo quæ a diversis *aëris* & *tempestatis* variationibus provenit, haud *salubris* existat, sed *varias morbosas* afflictiones provocet, ut & quod tot *diversa* crasis & consistencia cerevisiæ non omnibus subje-

dis proficua existat: quod etiam cerevisia *crassa*, saturata, valde pinguis & *inebrians* plurimis hominibus *inimica* sit, aquæ vero potus *semper idem* permaneat, modo non *impura*, neque valde *frigida* ingeratur: ita etiam *constans vini* usus, tanto minus *simplicis* salutaris est, quam ob rem in regionibus, ubi vinum *largius* crescit, potus *vini* cum pluriina *aquæ* substantia & portione *temperatur* & diluitur, neque etiam *quodvis* vinum *cujuslibet* corporis qualitatibus congruum est; hinc *vini* cum *Aqua* diluti laudes recenset *Rejesius l. c. qv. 85. n. 25.* unde facile liquet, quod *Aqua* aliis potulentis *temperiem* & *salubritatem* conciliare debeat, adeoque *præ aliis* potulentis *prærogativam* tueatur: hinc ex parte *antiquissimarum* gentium & Patriarcharum longævitatē *aquæ simplicis* usus promovit, ubi vicissim homines, qui *cerevisiario*, aut *vinoso* & *spirituoso* potu utuntur *comparative* ratione numeri & frequentię haud ad *similem* vitæ *durabilitatem* deveniunt. Sicut vero non *promiscuum* usum aquæ laudamus, ita *peculiares* adhuc conditiones & qualitates observari debent: nam *copiosus* aquæ potus, aqua *frigida*, *impura*, putrida &c. potius *damna* afferunt; siquidem in *nonnullis* subiectis ratio postulat, ut aqua leviter *aromatisata* hauriatur, quo *ventriculus* eandem *facilius* perferre queat: neque etiam proficit, mox *adsuetum* potum cerevisiarium, aut vinosum, cum *simplicis aquæ* usu *mutare*, sed *gradus* observandi sunt, ut *successive* natura hominis etiam aquæ potui *adsvescat*; quibus monitis & legibus multæ *aliæ* annecti possent, si in *specialiores* multas considerationes descendere cogitemus.

§. V.

Præterea nonnulli existimant, quod *abstinentia* a carnium esu ad *Longævitatē* promovendam contribu- at, quoniam *caro* substantia mollis & valde *corruptibilis* est, unde *Gelatina* e carnibus extracta cito *corruptionem* subit;

subit; quando itaque illa in succum & sanguinem, aut in partes solidas corporis humani convertitur, tunc exinde corpus *similem* qualitatem facile *corruptibilem* nanciscitur; quæ ratio non *omni modo* rejicienda est: hinc *Prosp. Alpinus in Medicina Indorum Lib. 1. c. 11.* refert, quod gens *Ægyptiaca* ob hanc abstinentiam a carnium comestione multo numero ad *Longævitate*m perveniat: in hac consideratione reminiscimur iterum illius solidi judicii *B. Speneri in Lebens-Pflichten Dominica 2. Advent. p. 27.* ubi testatur & profitetur: Indessen sehen wir, daß so bald nach der Sündfluth das Alter der Menschen um mehrere hundert Jahr stracks abgenommen, da ich etwa anderer verständiger weiteren Nachsinnen überlasse, ob nicht eben durch das Essen des Fleisches, und also eines Dinges, welches durch den Tod eines Dinges so bald in eine Zerstörung zu gehen anfängt (wie dann kein Fleisch ohne Verfaulung lang liegen kan) die Menschliche Natur noch mehr geschwächet worden, als da sie vorhin sich noch der einfältigen Speisen der Früchten, davon kein solcher verdorbener Saft kommt, gebrauchet hatten: *conf. Ejusd. Reichen-Predigten l. ante cit. p. 47. n. 3.* & licet Carnium esus *ante diluvium* non quidem *positive* a DEO concessus & *mandatus* fuerit, tamen non *omnimode inusitatus* fuit, *vid. Joh. Cluten in fasciculo Juris Canonici p. 9. Melchior Sebizius Lib. 3. de alim. Facult. c. 2. Rejes. l. c. qv. 85. Camerarius Syllog. Memorab. Cent. 12. particula 25. B. Spenerus in Lebens-Pflichten loc. cit.* ubi loquitur: Wir sehen vor der Sündfluth nicht, daß Gott eigentlich den Menschen das Fleisch zu essen zugegeben habe, weil erst nach der Sündfluth steht Genes. IX, 3. - - - und vielleicht auch die Gottlose vor der Sündfluth bereits sich die Erlaubniß selbst genommen hatten, weswegen er um der Menschen Schwachheit willen die Erlaubniß gegeben hätte, tamen ipse esus quodocunque in usum tractus fuit, *tanto magis* corpus *corruptibile* reddidit, id quod *facilius & certius* contingit,

quan-

quando sub *luxuriosa* carniū præparatione *tales* ipsis communicantur *qualitates*, per quas adhuc *facilius* fermentescunt & *putrescunt*: sicut ex *simplicissimis* experimentis compertum & probatum est, quomodo varia *additamenta*, præcipue *dulcia* carnes in putrefactionem præcipitant: quid quod tanto *facilius* contingit, ut carnes *vitiatae* & *speciali* contagio infectæ, malignos & *contagiosos* morbos provocent; hinc inter medicos disquisitio & observatio occurrit: *utrum* carnes *vitiatae*, aut *male præparatae* Rempublicam labefactare & eidem *damnum* inferre possint, vid. Fort. Fidelis Relat. Medic. p. 130. Ammannus in Irenico qu. 25. p. 175. de Noxa comestionis carniū a pecoribus contagiosa lue infectis, conf. Lentilius Miscell. Med. Pract. p. 509. Carnes pecorum lue infectorum sunt suspectæ A. N. C. Cent. 5. obs. 70. p. 123. & rarius omnino est, quod ejusmodi inquinatarum carniū comestio innoxia fuerit. vid. A. N. C. Cent. 8. obs. 9. p. 264. Ita etiam sanguinis comestio haud purum, firmum & durabile reddit corpus, quia ipse sanguis putredini admodum subjacet, vid. Garman. de mirac. mort. Lib. 3. tit. 1. §. 34. quæ observatio satis manifesta est: hinc multi etiam homines sanguinis animalium esculentorum esum mox in ventriculo ægre perferunt, variasque inde patiuntur afflictiones: quare Galenus lib. de atten. vict. rat. c. 8. sanguinem omnium animalium in cibo vitandum præcipit: & Bartholinus de sanguine vetito p. 58. inquit: *interest quoque reipubl. ne abutamur Dei donis, ne utamur illis, quæ cum comminatione prohibita, quanquam nobis placida & proficua: interest viri boni intra concessos limites se continere, cum eadem utilitatis, quæ honestatis, sit regula: nec sanitatis cura tanguntur, qui ex cruore utilitatem eruunt: nam nec medicamentum commodum est, nec alimentum: & Ægineta lib. 1. de Re med.*

med. c. 85. dicit: sanguis omnis difficulter concoquitur: ob id sanguinis comestio ob varias iustas causas in veteri fœdere Levit. 3. v. 17. c. 7. v. 26. c. 17. v. 10. prohibita, neque positive in N. T. sub Apostolico Ecclesiæ etiam statu concessa fuit: quin rectius abstinencia a sanguine mandatur Actor. 15. v. 20. 29. c. 21. v. 25. de qua meditatione pluribus conferatur eruditus tract. Bartholini de sanguine vetito.

§. VI.

Inter alias causas, longevitatem promoventes, merito simplicitas victus annotationem & commendationem meretur, quam etiam unanimi suffragio medici probant & innumeris exemplis confirmant: hinc Zac. Lusitanus Med. Princ. Hist. Lib. 6. hist. 17. qu. 3. p. 962. dicit: secunda causa longæ vitæ fuit, sobrietas & continentia in victu & potu & omnis vitæ moderatio: erat naturalis & simplex victus & potus; varietas autem mixtura & condimenta ciborum vitam debilitant & minuunt: cum hoc adserto consentit Camerarius in Sylloge Memorabilium Cent. 12. partic. 47. apud magnates quidem ob singularem varietatem, in multiplicandis ferculis, extolluntur coqui; sed tamen ista eduliorum varietas, omnino cruditiis & Cachymia causa existit; qui enim simplicem cibum sumit, facile, quo succo corpus ejus vel juvetur, vel gravetur, usu docente multiplici cognoscit: qui vero multiplici cibo alitur, diversas patitur qualitates ex diversitate succorum, nec concordant humores, ex materia varietate nascentes, nec efficiunt liquidum purumque sanguinem: hinc morborum scaturigo, qui ex repugnantium sibi humorum discordia nascuntur. &c. hinc idem author multis modis dietam simplicem commendat: Simili effato Bartholinus eloquitur: Cent. 5. hist. 28. p. 48. Longevitatis princeps

causa est simplex victus, Patribus olim usitatus, quo etiam Eremitæ quàmplures consenuerunt, conf. ejusd. Act. Hesn. Vol. i. obs. 49. n. ii. eandem victus simplicitatem comendat etiam Rejesius loco supra citato; conferantur porro Acta Philosoph. Anglicana An. 1668. mens. Octobr. eximie vero Diætam talem simplicem extollit Cornarius de commodis vitæ sobriæ & B. Spenerus locis citatis: Etenim talis Diætâ ut plurimum complectitur subiecta temperata, quæ corpori magis amica sunt, facilius digeruntur, neque ad suspèctam sanguinis plenitudinem aut perniciosam cacochymiam tam facile disponit, quæ enim alimenta & potulenta naturam & corpus non onerant, quæ etiam naturæ magis consueta sunt, quæ non valde concentrata, neque admodum pingua sunt, illa & mixtioni & reliquæ texturæ corporis magis conveniunt, quam quæ multis aromatibus imprægnata, variis saporibus qualificata & simul dulcia & acida, acria, amarulenta &c. sunt; quæ non ad copiosum ferum acre subtile sulphureum, salsum, aut largam bilem generandam idonea existunt, adeoque mixtioni corporis & sensui, consensui & viribus naturæ magis respondent & conveniunt; attamen ad simplicem victum haud referenda sunt subiecta cruda, concoctioni admodum refractaria & impura, sed quæ ratione subiecti, loci & ætatis magis congrua existunt; ubi partim alimenta & potulenta simplicia, partim præparatio ciborum simplicior præferenda est; nam quo plus artificii, luxuriei & delicati apparatus concurrat, eo magis sanitas alteratur & vita ad citiorem decursum & exitum disponitur: hinc ab illo tempore quo luxus in culina præcipue & epulis increbuit & illis locis ubi luxuries hæc observatur, morbi magis & brevitæ vitæ eminuerunt: ad hanc simplicem diætâ plurimum vegetabile regnum contribuit; quemadmodum modicus usus lactis & lacticiniorum, modo reliqua diætâ non sit valde

de

de pinguis & nutrienda, hanc longævitatē promovet: ita enim antiquissimorum populorum panacea & balsamus lac fuit: hoc enim bonam humorum temperiem conciliat, sanguinem diluit, acres & subtiles alias nocivas substantias corrigit & demulcet, excretionē faciliat, variasque alias utilitates confert: interim ad lactis usum non pertinet ingestio acidorum, valde salitorum, vinosorum, perquam fermentantium, mellitorum &c. subjectorum ingestio, quæ diversas perniciosas alterationes in corpore excitant, velut colicam, diarrhœam, choleram, sanguinis dyscrasiam, tussēs, rheumatismos &c. quamobrem usus lactis aliam simplicem diætā conjunctā requirit & eandem simplicitatē promovet.

§. VII.

Palmarium requisitum, subsidium & adminiculum ad Longævitatē acquirendam est, Temperantia & sobrietas, ne excessus etiam in simplici diætā committatur: ita enim in genere Plutarchus in salubr. præcept. inter media longævitatē numeravit: vesci citra saturitatem, sed & seorsim Porphyrius lib. 1. de abstinentia dixit: in simplicibus alimentis cavenda satietas: hinc Thonerus de sua Longævitate Lib. 6. ep. 4. p. 285. confessus est, ea esculenta & potulentia assumi, non quæ gula arriderent, sed quæ bonæ valetudini conducere: sub hac enim temperantia, vires non facile enervantur & nimium ad multa, varia, confusa & crassa, toleranda & tractanda coguntur, sed in justo tenore, ordine & processu conservantur: siquidem bonus ordo ratione gradus, temporis & successus insigne emolumentum est, ad omnes prosperos decursus rerum humanarum naturalium: hæc sobrietas neque utiles substantias ultra necessitatem accumulât, sed in justa quantitate conservat, neque inutiles colligit, motus vitales haud turbat & salutares excretionē in justo ordine conservat: hinc

*Thonerus l.c. p. 284. 285. dixit: illud singulare exemplum est, (loquitur de longævo, qui sub stricta quidem diætâ longam attigit vitam) quantum commodi præstet exacta victus ratio ad prorogandum vitam, etiamnum hodie imitandum inculcatur: hinc etiam Plato elocutus est, in quo loco multi sunt medici, in illo multa hominum est intemperantia: conf. Varro Lib. i. de re rustica c. i. Plin. lib. 7. c. 56. lib. 12. in proëm. haud vero sub hac vitæ sobrietate exactissimam & rigorosam, aut perquam strictam & ad stateram mensurandam diætâ comprehendimus; cum rariora sint longævorum exempla, qui tam scrupulosa & sollicita diætâ usi sunt, ut supra monuimus, quoniam adeo emollita & indulgenter tractata natura levissimas alterationes ægerrime perfert, ut facile dehinc tales homines succumbant: & licet Aloysius Cornelius, qui ad libellam vixit & alius quidam, cujus Thonerus loco citato memoriam injicit, sub stricta diætâ ad 95. annum pervenerit, tamen tales casus infrequentiores, neque pro regula & lege ad imitandum constituendi sunt: Stricta enim diætâ accurate servanda est; qui vero tam rigoroſe suam naturam tractat, servus rectius corporis & ventris redditur: quare illi, qui aliquando vel paululum ultra modulum, pondus & mensuram adſueta ingerunt, mox inde eximia damna patiuntur: haud enim tam indulgenter natura hominis tractanda, sed ipsius viribus negotia & tolerabiles labores administrandi & expediendi conferri debent, alias illa iterum ſegnīs & languida redditur: neque enim pro diverſitate laborum & appetitus quotidiana exacta mensura victus & potus constitui potest: evitetur excessus & obſaturatio: optimum est si adhuc aliqualis appetitus ad victum conſerve-
tur, ſecundum vulgare dictærium, wans am beſten ſchmeckt, ſoll man aufhören: hinc communi ſuffragio intemperantia quoad cibum & potum vitæ brevitatem conciliat:*

ob

ob id *Camerarius in Sylloge Memorabilium Cent. 12. partic. 50. guloſorum vanitatem & caſtigationem conſcripſit: hinc paraſiti & qui plurimis epulis, conviviiſ, nuptiis & ſympoſiis interſunt, raro ad longam vitam pertingunt, dum a cerere & baccho onerata natura, tantum concoctionis functioni plurimas vires impendens, ægrius ſalutaribus aliis conſervatoriis actibus invigilare operamque dare poteſt: quin mature in officina naturalis coctionis eadem natura enervatur & corrumpitur, ut ſucci pravi generentur, reliqua officia conſuſe procedant & ſic ob multas alias connexas cauſas vita abbreviatur.*

§. VIII.

Vitæ longitudinē & firmitatē reſiſtit etiam crebra diætæ mutatio; generalis quidem ejus, cui nunc homines adſueti ſunt, permutatio inimica utique eſt: hinc *Hippocr. lib. de nat. human. §. 19. text. 8. dicit: nam ſi quis cito diætā permutet, periculum etiam eſt a permutatione aliquid novatum iri in corpore:* hanc obſervationem multi medici confirmant: ita *Camerarius l. c. partic. 49. demonſtrat, quod ciborum varietas animo & corpori noceat & Riedlinus Lin. Med. An. 6. obſ. 15. Menſ. Septembr. p. 1039. hiftoriam allegat, cujus titulus Diætæ mutationem brevi ſubſequens mors: conf. Solenander ſect. 5. conſ. 15. n. 16. Rejes. qv. 93. Galenus de rect. vict. rat. Huc etiam illa mutatio referri debet, quando quidam homines calido potui adſueti, aliquando frigidis ingeſtis indulgent, unde non modo graves morbi, ſed & vitæ pericula imminent & ingruunt conf. Galenus de alim. facult. lib. 1. & de conſuetud. lib. 1. Majolus in diæt. conic. tom 1. Hildanus Cent. 3. obſ. 94. A. N. C. dec. 3. an. 7. obſ. 73. ita etiam multis exemplis comprobatur noxa frigidi potus conf. Zac. Luſit. Prax. admir. lib. 3. obſ. 104. A. N. C. dec. 3. an. obſ. 93. Marcell. Donatus L. 2. c. 6. Riedlinus Lin. Med. An. 1. Menſ. Febr. obſ. 21. p. 54. inde facile demon-*

strari potest, quod sub diætâ *moderate calida*, tepida, temperata, nec *valde frigida*, incrassantia &c. usurpanda sint: Proinde in genere *ingesta* respondere debent, *quantitate* & *qualitate viribus* & *consuetudini* subjectorum, nec non *laboribus* & *vitæ generi*, sicut *Sanctorius* ex parte in *Medicina Statica* monuit; nam quo *plus* aut *minus ingerit*, quam egerit, ille vitæ & sanitatis damna & detrimenta incurrit: perinde *proportionata* esse debet *consistentia* esculentorum & potulentorum ad *vires* subjectorum: nam *robustis* naturis *firmitate corpore* instructis, *tenuis, mollis* & *delicata* diætâ *haud* ad vitam longam acquirendam idonea est, dum inde *vires emolliuntur* & humores *haud adequatam* ad *fibras robustas* nanciscuntur *consistentiam*: & vice versa hominibus, viribus *exiguïs* aut cito *languentibus* instructis, *fibris teneris* & *laxis* præditis, *haud* diætâ *crassior* conducit, neque frivole illa diætâ *immutanda* est, quæ *alicui* subjecto congrua existit: Præterea adhuc notandum, quod *Longævitas non semper* aut absolute *constanter* firmam & illibatam sanitatem complectatur: quin occurrunt exempla *valetudinariorum*, qui *iusta* sui corporis cura & conveniente Diætâ ad *longiorem* interdum perveniunt vitam & *canam* attingunt senectutem: Interea *haud absolute* decerni potest, quæ *specialissima* diætâ *omnibus* commendanda & a quibusvis servanda & *observanda* sit, quoniam ad *personales* & *individuales* circumstantias sollicita attentio dirigenda est: Hinc nulla diætâ *adeo pura* & *innocens* existit, quin *aliqualis* alteratio a *qualibet* præsumi debeat, interim vitæ & sanitati inservit, si *vires vegetæ* & *sufficientes* tales *alienas* & *inensas* substantias atque causas *tempestive removeant* & subjungunt: quam ob rem in omni cæteroquin etiam *selectissima* maximeque *temperata* Diætâ prædictæ qualitates, ad vitam longam spectantes, observandæ & promovendæ, præcipue *excretion-*

nes

nes debite promovendæ sunt, quia etiam in corpore nostro nihil durabile est & fluidæ imprimis partes, quæ nunc laudabiles sunt, in brevi temporis intervallo prævæ & inimicæ evadunt: optima itaque ad longævitatē illa est diætā, quæ salutarium excretionum libero, sufficienti & legitimo successui inservit, nam per has præcipue corpus conservatur & a corruptione mortifera præservatur: Et cum hac consideratione omnes reliqui respectus conspirant, præcipue motuum vitalium vigor, tenor & ordo, qui ad justam evacuationum absolute spectat & quem talis etiam diætā satis efficaciter sublevar.

§. IX.

Ad longam vitam in genere quidem aliqualis bona & vegeta constitutio requiritur, sicut recte Zac. Lusitanus l. c. monuit, quā deficiente Diætā haud tam magnam vim exserit, siquidem ipsa Diætā sub directorio & modificatione vigorosæ naturæ stat; quæ si valde debilis fuerit, haud diutius & efficacius corporis commodis prospicere poterit, sed citius corporis sui fragilitatem & vitæ naturalis fugacitatem ipso actu experitur: unde quidem contingit, ut ejusmodi imbecilles homines per usum congruæ Diætæ comparative ad paulo longiorem vitam ascendunt, haud vero exquisite & eminenter Longævitatē attingant: licet longior illa vita ad quam debiles tales naturæ perveniunt, relativa & individualis existat: quando vero vires naturales a nativitate, per hereditariam communicationem, per rationem nationis &c. vegetiores sunt, tunc Diætæ justa conciliatio per ordinem & potestatem naturalem paulo longinquiore & firmiorem sanitatem & vitam promittit: etenim quo magis vires gradu atque robore præstantes & præsentēs sunt, eo melius & expeditius functiones illæ succedunt, quæ ad vitam longam contribuunt: In hac itaque Diætæ conciliatione
&

& applicatione ratio habenda est *quantitatis, qualitatis & ordinis*: Quoad *quantitatem*, nonnulla requisita in præcedentibus annotavimus: omnis *saturatio* mala: nam *obruit & enervat vires*, proxime in negotio *concoctionis* & per connexionem in toto reliquo corpore; accumulat *impuritates & cruditates*, *auget humores*, præcipue sanguinem cum *præjudicio*, *obruit etiam functiones se- & excretorias*: hinc damna *voracitatis* nimixque corporis oppletionis satis superque manifesta sunt: ita ventriculus *nimum cibis oneratus animum & corpus ad lassitudinem & debilitatem* disponit: quo magis enim *vires* ad *concoctionis* negotium impendendæ sunt, eo minus *sufficienter reliquis functionibus* quadrant: hinc corpus variis *infirmis* & *morbosis* invasionibus subicitur, ut citius denique vita *abbrevietur*: quanta damna a *plena* dicta *teneris* infantibus accidunt, multa luctuosa testantur exempla: Ita etiam *superfluous potus* animum & corpus onerat, enervat, confundit & corrumpit: hinc *cibus & potus* mensurandus est in *relatione* ad *vires, ætates, labores & proprias suas qualitates*: nam quæ *subjecta plus* nutriunt, illa in *minori* quantitate ingerenda sunt; quæ *crassiores* habent consistentiam, in *minori* perinde quantitate assumi debent: quæ *humores & partes solidas* magis afficiunt, *motum* videlicet *majorem* in iisdem alliciendo, illa *modica* magis quantitate excipi debent, talia sunt *aromatica, spirituosas, vinosas & alia potulenta inebriativa*: quæ *subjecta humores* valde *tenuis* nimiamque *mobiles* generant, illis *mediocriter* consistentia *temperata* tamen alimenta & potulenta conducunt & quæ facile *spissos* colligunt & nanciscuntur humores, quibus etiam partes magis *siccæ & exsuccæ* sunt, illis magis *liquida, tenuia, relaxantia, lenientia, emollientia, resolventia, diætetica oleosa, lacticia, serum lactis, juscula,*

juscula, potulenta, aquosa conducunt; id quod etiam valet de illis subjectis, quæ in *difficiles* excretionum successus, *stagnationes* humorum & viscerum infarctus inclinant: quicumque homines sub *vegetiori* nutritione *firmitiori* & ampliori indigent corpore, qui etiam in *operosis* corporis laboribus & exercitationibus versantur, adeoque *plus* sanguinis consumunt, eundemque in forma seri per *sudorem* & *urinam* *largius* evacuant, illorum *Diætâ plenior*, haud tamen *vorax* & *nimia* esset debet: Et hæ regulæ quoad *quantitatem* *Diætæ* annotandæ sunt, quibus plures & specialiores addi possent, sed suffecerit hac *manudictione* ad ultiores meditationes viam & occasionem monstrasse, tanto magis cum præsentî specimine *brevitatem* tractationis & annotationem *fundamentalium* respectuum selegerimus.

§. X.

Ratione *Qualitatis* victus & potus perinde *temperatus* sit, ne copiosa & perniciofa *inquinamenta* supeditet: in genere *omnibus* hominibus magis *liquida*, quam solida conducunt, quæ sanguinem in congrua *fluiditate* conservant, *recrementitias* tenues substantias *diluunt* & corrigunt; fibras *flexiles* reddunt, *organa* se- & excretoria *leniunt*, humectant & subinde quaslibet *salutares* evacuationes promovent & faciunt, lympham in *puritate* & *mobilitate* servant, sub qua *nutritionis* functioni facilius obtemperat, abstersionem *impurarum* & inimicarum substantiarum tam in *humoribus*, quam *partibus* solidis sublevant, adeoque *salutares* motus naturæ in hisce officiis allevant, ne eadem in *ordinariis* suis functionibus multas *difficultates* *salutares* successus impediētes & turbantes subeat, neve propterea quoad *vires* facile *enervetur*: tanto magis *sufficiens* humido-
D
rum

rum usus requiritur, quando sub *simplici* Diæta & usu panis *crassioris*, fructuum horreorum, aliorumque esculentorum vegetabilium, *crassiores* substantiæ resolvi, *mobiliores* & tractabiliore reddi & ad *faciliorem* evacuationem præparari & adjuvari debent: hinc ad *copiosum* usum panis *crassioris* optime quadrat usus *aquæ*: quidquod *juscula simplicia* multam opem salutaris motuum vitalium progressui conferunt: *modicus* usus subjectorum *aromaticorum*, diversitati ætatis, temperamenti, sexus, *vitium*, alimentorum reliquorum &c. accommodatus perinde *variis* modis ad vitam *sanam* & *longam* confert, dum *concoctionem* adjuvare, *cruditates* attenuare, *motum* sanguinis allevare & *fibras* roborare adjuvat: neque etiam *Salis communis* usus *modicus* sub Diæta contemnendus est: etenim hoc perinde *crassum* cibum resolvit, alias spissas & *crudas* materias *colliquat*, serum excrementitium *rarefacit*, *fibras* ad motum constrictorium & connexum *se- & excretorium* stimulat & *multiplicem* alium usum præstat: hinc homines *nimis* religiose & scrupulose *Salis* usum abhorrescentes variis *agrotationibus* obnoxii redduntur: eandem *utilitatem* *Salis* ad promovendam *Longevitatem* testantur *Horstius Opp. Tom. 3. Hæferus in Herc. medic. Lib. 2. c. 1.* excludatur modo *nimius* hujus *Salis* usus, qui facile ad humorum *acrimoniam* & varias alias *connexas morbosas* qualitates disponit: *Dulcia* & *saccharata* an ad vitam *longam* conferant, æque quæritur: ast hæc non *promiscue* singulis conducunt, nam cum *bile* & *lacte*, ut & *aciditate* non bene conveniunt, cum quibus *perniciosa fermentationem* subeunt, colicam, diarrhœam, vomitus, Cholericos morbos &c. excitant: & licet eadem *alvum* elubricent, tamen circumspecte inquirendum est, an non *aliæ* praviæ & præjudiciosæ materiæ usum *dulcium* respuant: hinc in *infantibus*, subjectis *hiliosis*,

lios, ubi *acida* subiecta ingeruntur, sub diætâ *vinosa* &c. dulcia haud sanitati & vitæ subveniunt: in subiectis vel *senibus* vel ad senium appropinquantibus dulcia *album* laxam servant: proinde etiam *mellita* caute sunt usurpanda, ne videlicet *alia pingua*, lacticia, fœculenta & *fermentationem* facile subeuntia aut valde augentia una ingerantur: *Galenus lib. 3. de aliment. cap. de melle* dixit: *Mel, saccharum & alii liquores mellaginei ob partium suarum tenuitatem, in corporibus calidis, prompte in bilem convertuntur: hinc Jæpserus in manu duct. ad vitam longam P. I. c. 7. p. 51. demonstravit, quod multi dulcibus lædantur: Præterea cibos semper molles nimiumque coctos ingerere non proficit: interdum naturæ viribus quædam consistentiora alimenta offerenda sunt, ne illa in concoctionis negotio negligentior, torpidior & ignavior reddatur: esculenta acerba, valde acida, austera, adstringentia ut plurimum in primis viis multas turbas excitant, excretionem salubres impediunt, aut sufflaminant & humores laudabiles inquinant & impuros reddunt: oleosa dietetica, justus butyri usus, inter antiquos simpliciori diætæ annumerata fuisse, quæ hodiernum etiam sanitatem & vitam sublevant: Potus purus, limpidus, tenuis, temperatus, plus ad vitam longam confert, quam spissus, saturatus, fœculentus; quare cerevisia, consistens, crassa, pinguis valde, nimis alimentosa & inebriativa parciore quantitate assumenda, aut alia diluentia liquidiora ejus usui interponenda sunt: Vini usus modicus, nec tamen quotidianus, aut si alius potus haud usu receptus est, cum majori aquæ quantitate diluti & temperati & corpori & animo subvenit, humores resolvit, excretionem diaphoreticas & diureticas promovet & vires subinde confortat: Frigida valde alimenta & potulenta, tanto magis æstuante corpore ingesta, valde nocent: Et hæc nonnullæ principales observationes quoad*

qualitatem victus & potus, ad Longævitatē contribuentem, annotatæ, præsentī disquisitioni & meditationi inserviunt: Specialissimam applicationem Dissertationis & Speciminis limites non admittunt: suffecerit etiam in hac consideratione manuductionem ad reliquam deductionem & applicationem subministrasse.

§. XI.

Longævitatē denique promovet *justus ordo* in Diætā servandus, siquidem *ordinata omnium actionum humanarum administratio salubres successus & prosperos eventus rerum promittit & vice versa: splendida convivia, miscellanea Diætā, multiplicia & diversa fercula non ad ordinem Diætæ, nec ad ordinem naturæ pertinent, sed concoctionem turbant & confundunt, chylum impuriorem reddunt, corpus humanum aliis multis recrementitiis substantiis opplent & inquinant, adeoque variis modis æconomiam vitæ & sanitatis pervertunt & lædunt: unum alterumve temperatum edulium, plus proficit, quam illorum copia & varietas: Victus & potus cum naturali bono & vegeto appetitu assumatur, ita tamen, ne hic obruatur & in nauseam convertatur: haud tamen ultra legitimum appetitum, aut contra hunc alimenta & potulenta obtrudantur & ingerantur, quia hæc oppletio animo & corpori infensa est: naturalis appetitus certis etiam diei horis respondet, qui ordo in ratione temporis observatus perinde salutaris est, quamvis homines plebeji, laboriosi & vilioris fortis, etiam sub durioribus suis negotiis appetitum hunc sentiant, hi tamen ad ductum naturæ vivunt, dum strenuis se operibus fatigant, adeoque appetitui naturæ indulgere debent: interim vitæ & sanitati plus proficit, si sub reliqua animi & corporis quiete cibus & potus ingeritur,*

geritur, neque subito *post* hanc ingestionem *ardui* labores *animi* & *corporis* suscipiuntur & continuantur: quoniam *vires*, ad *digestionis* negotium necessaræ, facile in subjectis *sensibilibus* dilapidantur & propterea concoctio *difficilis* redditur, atque *crudior* chylus paratur: interim hæc regula in subjectis *robustis* & *duris* non tam *accurate* servanda, modo in hisce etiam, tale quid haud quotidie committatur: alias appetitus in *ataxiam* ruit: consultius vero erit, *post* ciborum ingestionem *aliquali quiete* frui, aut *moderata*, haud tamen strenua operosa & *excedente* corporis commotione uti: *nocturnæ* commestationes, aut victus & potus ingestiones æque naturæ *ordinem turbant*, siquidem *hisce* horis non modo *longior* quies *animi* & *corporis* capeßenda, sed potius functio *secretoria*, *sanguificatoria* & *nutritoria* expeditius succedere debet: hinc in multis hominibus *plenior* coena *somnum* turbat, quales *nocivæ* ataxiæ tanto magis oriuntur, si in *profundiori* nocte tales compositiones & ingluvies instituuntur: unde homines qui adeo *eminenter* ordinem naturæ turbant & *noctem diemque* inter se *confundunt*, functiones *diurnas* in *noctem* differunt, ut plurimum *valetudinarii* redduntur & *præmatura* morte decedunt: alias jam satis notorium est, quanta offendicula *potus nocturni* sanitati inferant: *Æstivo* tempore, quo necessaræ *humiditatis* in corpore *major* dissipatio & *consumptio* contingit, potus *sufficiens* non est interdicendus aut subtrahendus: siquidem *hyberno* tempore, quo *cruditates* facilius colliguntur & *humores* ob multas rationes facilius *incrassantur*, perinde *sufficiens* potus necessarius est: quando etiam nonnulli homines illam *irregularitatem* diætetica amplectuntur, ut *comparative plus* bibant, quam *alimenta* assumunt, tunc *ventriculus* ita debilitatur, ut appetitus

naturalis facile *destruatur*, cibi *ægrius* digerantur & in ventriculo perferantur, unde nonnunquam *cardialgiæ* & *conatus vomendi*, *diarrhææ* suspectæ & valde enervantes &c. increbescunt, admodumque *sanitatem lædunt*: *inordinatus* usus *spirituosorum*, velut spirituum & aquarum ardentium, aut positive *carminativorum*, multum sanitati & vitæ præjudicat, dum in *libera* & *naturali* virium suarum applicatione natura valde offenditur & enervatur & negotium *digestionis* tandem graviter *pervertitur*, præsertim si nonnulli homines *usui* talium spirituosorum plane *adsuescunt*; inde iterum ferme omnes ad vitam & sanitatem spectantes functiones *turbantur*, ut tales inordinati *gulosi* æque *præmatura* morte extinguantur: Multiplex *mutatio* cum potu & victu variis *alterationibus* in *primis regionibus* ansam dat, quæ perinde sanitati & Longævitati præjudicant: cavendum tamen insuper est, ne prava *avidæ* appetitus & *voracitatis consuetudo* acquiratur: siquidem *animales* & *naturales* functiones in *justo ordine* conservandi sunt: Hasce regulas respectu *Ordinis dietetici*, quibus plures aliæ addi possent, tradere placuit: quamobrem in *succincta* hac præsentis thematis commendatione & deductione acquiescimus: Deo submissas & devotas exhibemus grates, quod præsentem laborem prospero successu prosequi voluerit, quem humillime etiam rogamus, ut hæc & omnia alia salutaria monita & consilia exoptatus prosequatur

F I N I S.

Clariss.

CLARISSIMO DOMINO CANDIDATO

S. P. D.

P R Æ S E S.

Quanto amoris & desiderii fervore atque affectu mortales naturalem prosequantur dierum longitudinem aut vitam, satis manifestum est, licet spiritualis vita longe majorem mereatur æstimationem; *nam qui animam suam i. e. vitam servare voluerit, eam perdet, qui vero animam suam i. e. vitam naturalem mea causa perdiderit, eam inveniet*, effatum Salvatoris est *Matth. XVI, 25.* ex cujus ore etiam fluit decretum *Luc. XIV, 26.* *Si quis ad me venit, atque adeo suam ipsius animam non odit, non potest meus esse discipulus:* Etenim de naturali vita recte judicat *Gregor. Nazianz. in Orat. X. p. 64.* nonne ex paucis his diebus, qui restant, hoc solum lucri faciemus, ut plura mala partim videamus, partim patiamur, partim fortasse etiam faciamus, atque ita tandem ipsi quoque naturæ legi commune ac firmum & stabile tributum perdamus, atque alios sequamur, alios præcedamus, ab aliis lugeamur, munusque lacrymarum, quod aliis contulimus, ab aliis recipiamus & *Plinius Lib. 7. c. 50.* asserit: tot enim periculorum genera, tot morbi, tot metus tot curæ, hanc videlicet circumdant vitam: *natura vero nil hominibus brevitate vitæ præstitit melius:* cum fine vitæ naturalis, bene gestæ, finem assequuntur miseriæ & calamitates humanæ & initium faciunt æterna quies, gaudia & gloria: Diu vivere, est diu miseriæ & peccatorum tentationes pati: Interea quem vivimus diem cum morte dividimus dixit *Seneca Ep. 24.* unde *Augustinus Serm. 74.* hanc vitam perpetuum dicit esse morbum: neque etiam adhibita quamvis omni sollicita cura hæc naturalis vita in æternum propagari potest, ut *Galenus* asseveravit *lib. de Marcore c. 2. conf. Zac. Lusitan. H. M. P. Lib. 6. hist. 9. p. 952.* Quam ob rem fragili nostro corpori variis adminiculis suppetias ferre nitimur, ne domicilium hoc testaceum brevi corruat: quidquod adhuc Senes media & consilia ad longiorom vitam desiderant & nonnunquam impetrant, *vid. Hildanus Cent. 6. obs. 28.* proinde testimonium prostat, quod quidam Senex septuagenarius in quotidiana precatione usus rogatione Davidica *Psf. CII, 25.* *Deus mi, ne auferas ne in dimidio dierum meorum.* *conf. Gerberi Historia Regenitorum Part. IV. hist. 19. p. 348. 349* Ast quando inter alia adminicula Diætetica subsidia ad Longævitatem acquirendam commendantur, ita præcipua nostra cura sit, ut, dum naturalis vita imperfecta, infirma & fragilis est, adhuc in hac vita etiam æternam, infinitam, perfectam & durabilem spirituales acquiramus: Annitamus ut credentes vitam per ejus nomen adipiscamur *Job. XX, 31.* Procuremus non perituros

*riturum cibum sed in omnem perennitatem permanfurum Job. V, 27. Si-
ciamus, Venimus, sumamus aquam vitæ gratis. Apoc. XXII, 17. rogemus Sal-
vatore, ut nobis det aquam vivam:* ita sub infirma naturali nihilominus
æteruam impetrabimus vitam & nunquam defituram Longævitatē. Tu
Clarissime DN. CANDIDATE præfenti Specimine Inaugurali Longævitatē
ex Diætā, laudabili instituto explicasti, Tuæque salutaria consilia ad natu-
ralem sanitatem tuendam & vitam prolongandam contulisti: reliqua
divinæ benedictioni committuntur, memores illius, quod nostrum plan-
tare & irrigare sine divino augmento nihil valeat: Selegisti meditationem
perutilem, admodumque necessariam, quoniam multi ob malam diætā
& intemperantiam avtochiriæ crimen committunt, viresque suas nefarie
destruunt atque corrumpunt. Faxit divina Bonitas, ut transgressores re-
gularum harum diæteticarum resipiscant & sub naturalis vitæ tutela, spi-
ritualem quærant, inveniant & retineant. *Tibi* vero de prospero exitu
Academicorum laborum sincero gratulor affectu: præstitisti Te talibus
publicis & externis ornamentis dignum, dum non modo in scientia, sed
& experientia Medica & Chirurgica laudabiles progressus fecisti, quare
nullus dubito, quin sub continuante adjutorio divino porro in vinea
Medica multam frugem feras. Perge ante omnia & persiste in hac Se-
mita, quam hætenus ingressus & profecutus es; nunquam desiste a cultu
& timore divino, sine quo miserrima est vita, miserrima etiam medicina:
Deus enim fecit medicum; hinc Medicus cum Deo cuncta suscipere &
peragere debet: In quo Tu itaque hætenus sub variis rerum vicissitudi-
nibus ingenuas Tuas perfecisti operas, in eo ulteriori dexteritate plus ul-
tra tendere allabora: Vitæ naturalis fragilitatem & brevitatem in variis
orbis locis & regionibus, quoad internas & externas calamitates observa-
sti, insuperque huc usque variam opem afflictæ fanitati obtulisti: Coronet
porro divina Clementia Medicos Tuos conatus, salutari successu: & qui
bona indole & sincera integritate mentis clarus es, ita hac eadem dexte-
ritate impofterum res Tuas Medicas exerce, quibus Deus vitæ & sanitatis
Author, Sator, protector & conservator semper annuat; ita eveniet ut
tanquam fidi servi Domini ex hac vita naturali cum spiritali vero &
æterna atque beata firmiter conjuncti, in perfectissimam Regni gloriosi
Vitæ & Longævitatē transmigremus, ubi Longævitatē ex Diætā Do-
mini nostri Jesu Christi acquirimus, ut *comedamus & bibamus in mensa e-
jus, in regno ejus, Luc. XX, v. 30. & ut in regno Dei cum nostro Salvatore
novum bibamus Marc. XIV, 25.* ut nostra ætas, Vita & anni non consu-
muntur. Vale & Vive in DEO. Dabam e Museo XIX. Ka-
lend. Septembr. A. O. R. cId Idcc XXVIII.